

Atuisartunut pisisartunullu siunnersuisartoqatigiit, tuniniaasarneq, nalunaaqutsersuisarneq, akit aamma atuisartunut pisisartunullu maalaaruteqartarfittut ataatsimiititaliat pillugit Inatsisartut inatsisaata allanngortinneqarnera pillugu Inatsisartut inatsisaattut siunnersuut.

pillugu

Inatsisartut Inuussutissarsiornermut Ataatsimiititaliaata

ISUMALIUTISSIISSUTAA

siunnersuutip aappassaaneerpeqarnerani saqqummiunneqartoq

Inatsisartut Inuussutissarsiornermut Ataatsimiititaliaat suliarinninnermini makkuninnga inuttaqarpoq:

Inatsisartunut ilaasortaq Ruth Heilmann, Siumut, siulittaasoq
Inatsisartunut ilaasortaq Ane Hansen, Inuit Ataqatigiit, siulittaasup tullia
Inatsisartunut ilaasortaq Jens-Lars Fleischer, Siumut
Inatsisartunut ilaasortaq Thomas Kristensen, Atassut
Inatsisartunut ilaasortaq Marie Fleischer, Demokraatit

Siullermeerinerup kingorna siunnersuut Inatsisartut Inuussutissarsiornermut Ataatsimiititaliaata misissuataarsimavaa.

Aallaqqaasiut

UKA 2006-imi ullormut oqaluuserisassani immikkoortoq 139-mi siunnersuutigineqarpoq Inatsisartut aalajangissagaat Naalakkersuisut peqquneqassasut, Atuisartunut pisisartunullu siunnersuisooqatigiit, tuniniaasarneq, nalunaaqutsersuisarneq, akit aamma atuisartunut pisisartunullu maalaaruteqartarfittut ataatsimiititaliat pillugit inatsisartut inatsisaata allanngortinneqarnissaanik, tassuunakkut inatsisartut inatsisaani § 24 malillugu niuertut nalunaaruteqartarnissaannik peqquneqartalernissaannik akit iluanaaruteqartarnerlu pillugit misissuisarnissanut atugassanik nalunaaruteqartussaataitanerannik, sumiginnaasullu imaluuniit eqqunngitsunik nalunaaruteqartut akiliisinneqartalernissaannik imaqartumik.

Aalajangiiffigisassatut siunnersuut Inatsisartut Inuussutissarsiornermut Ataatsimiititaliaannit misissorneqarpoq, taakkulu isumaliutissiisummik saqqummiussillutik, tassanilu ataatsimiititaliap isumaqatigiittup siunnersuut Inatsisartunit akuerineqassasoq inassutigalugu.

Siunnersuutip imarisaa

Naalackersuisut siunnersuummut nassuiaatini allapput, allannguutissatut siunnersuuteqarnermi siunertaasoq akinik misissuititsinermit atatillugu suliffeqarfiit paasissutissanik tunniussinissamut pisussaaffilernissaannut inatsisitigut tunngavissiinissaq kiisalu paasissutissanik tunniussinissamik pisussaaffik naammassineqanngippat akiliisitsinissamut inatsisitigut tunngavissiinissaq.

Tamannalu Inuussutissarsiornermut Ataatsimiititaliap isumaliutissiisummigut Inatsisartunut inassuteqaataanut naapertuuppoq.

Aammattaaq matumani siunnersuutigineqarpoq atuisartunut pisisartunullu siunnersuisartoqatigiit iluanaarutini misissuinissamut periarfissaqarnerat peerneqassasoq, paasissutissat tamakku atuisartunut attuumassuteqartut nalilerneqanngimmata.

Tusarniaanermi akissutit

Siunnersuutip saqqummiunneqannginnerani KANUKOKA-mut, Kalaallit Nunaanni Atuisartut Siunnersuisoqatigiivisa Ataatsimut Allattoqarfiannut Unammilleqatigiinnermullu Ataatsimiititaliamut, NUSUKA-mut, Kalaallit Nunaanni Sulisitsisut Peqatigiiffiannut ILIK-mullu tusarniaassutigineqarsimasoq Naalackersuisut ilisimatitsissutigaat. Taakku tusarniaassummut tamarmik akissuteqarput. Tusarniaanermi akissutit inatsisissatut siunnersuummut attuumassuteqartortaat ilanngunneqartut Naalackersuisunit ilisimatitsissutigineqarpoq.

Tusarniaanermi akissutit nuutinnerini Ataatsimiititaliap siunnersuummik matuminnga suliarinninnermini atugassaminik Aataatsimiititaliap pissarsisimavoq. Tusarniaanermi akissutissiamut peqqissaarunneqartumut Ataatsimiititaliamut aamma nassiunneqartumut Ataatsimiititaliap qujavoq.

Ataatsimiititaliap suliarinninnera

Siunnersuummi akinik misissuinermit tunngasortai Ataatsimiititaliap nuanaarutigai. Iluanaarutaasartut pillugit misissuisarnerit inatsimmit tassannga peerneqartussatut siunnersuutigineqarnissaat Ataatsimiititaliap naatsorsuutigineqarsimanngikkaluarpaapeqquserlugulugu. Naalackersuisut saqqummiussisummini allapput tunitsiviusartuni ersarinnerulersitsineq tamatigut annertunerusumik unammilleqatigiilersitsineq ajortoq, taamaattumik iluanaarutaasartut pillugit misissuisarnissat aalajangersakkamit peerneqarnissaat siunnersuutigineqartoq. Aammattaaq unammilleqatigiinnermut inatsisip massakkut nalilersorneqarnerani tamanna aamma isiginiarneqarumaartoq Naalackersuisut allapput. Nutaamik unammilleqatigiinnermut inatsisiliortoqarneratigut unammilleqatigiittarnerit annertusarneqarnissaat Naalackersuisut anguniarpaat, tamannalu atuisartunit isigalugu akitigut pitsaasumik sunniuteqassaaq.

Tassunga atatillugu iluanaarutaasartunut inatsimmik nunatsinni qaqugu atuutsitsisoqalissanersoq Siumup apeqquutigaa. Taamatut inatsisiliortoqarnissaanut siusinnerusukkut suliniuteqartoqarsimavoq piviusunngortinneqanngitsumik, taamaattumillu suliasaqarfimmi tassani inatsisiliornissamut piffissanngortoq Siumut isumaqarpoq.

Unammilleqatigiinnermut inatsisip allannngortinneqarnissaanut pissutsit iluanaarutaasartunut attuumassutillit maanna nalilersorneqarnerat pillugu nalunaaruteqartoqarsimasoq Inuit Ataqtigiit oqaatigaat. Pissutsit iluanaarutaasartunut attuumassutillit pillugit paasissutissiisarnissamut malittarisassiortoqarnissaa Inuit Ataqtigiit naatsorsuutigaa, taakku atuisartunut tusartinneqarnissaat naleqquttuummat.

Iluanaarutaasartut pillugit misissuisarnissanut aalajangersakkap peerniarneqarnera Atassutip eqqarsarnartoqartippaa isumaqarlunilu siunissami misissuisarnissat taamaallaat akinut atuutissanersut peqqissaartumik nalilerneqartariaqartoq misissorneqartariaqartorlu.

Iluanaarutaasartut pillugit atuisartunut tusartinneqartarnissaat tulluartsuorsorneqannginnera pissutigalugu iluanaarutaasartunut tunngasut aalajangersakkamit peerneqarlutik § 24-p Naalakkersuisunit allannngortinniarneqarnera Demokraatit kisiartaallutik isumaqtigaat.

Iluanaarutaasartut pillugit misissuisarnissat peerneqarnissaannik Naalakkersuisut siunnersuutaannut qulaani taaneqartumut partiit ataasiakkaat oqaaseqaataannut Naalakkersuisut isumaat Ataatsimiititaliamit ujartorneqarpoq.

Tamanna tunngavigalugu siunnersuut Inatsisartunit akuersissutigineqassasoq **ataatsimiititaliap isumaqtigiittup inassutigaa.**

Taama oqaaseqarluni Inatsisartut Inuussutissarsiornermut Ataatsimiititaliaata siunnersuut aappassaaniigassanngortippaa.

Ruth Heilmann,
Siumut,
siulittaasoq

Ane Hansen,
Inuit Ataqtigiit
siulittaasup tullia

Jens-Lars Fleischer,
Siumut

Thomas Kristensen,
Atassut

Marie Fleischer,
Demokraatit

